

樂城集

五

樂城集卷之九

宋西蜀蘇轍子由著

明東吳

王執禮子敬
顧天敘禮初

仝校

詩七十首

春日耕者

陽氣先從土脈知老農夜起飼牛飢雨深一尺春耕利日出三竿
曉餉遲婦子同來相嫵媚烏鳶飛下巧追隨紛紜政令曾何補要
取終年風雨時

自柘城還府馬上

春色無人見茲行偶眾先柳黃新過雨麥綠稍鋪田河潤兼冰散
禽聲向日圓城池高受霧濼渙暖生烟送客情初惡還家意稍便
旋聞夫事起已過佛燈然簿領何時畢塵埃空自憐南湖漸可到
早治木蘭船

次韻子瞻人日獵城西

將賢士氣振令肅軍聲悄晨登戲馬臺一試胡騷裊城空蒼無人
里社轉相曉吾公庶無疾但恐園囿小荆榛一焚蕩雉兔皆驚矯
翩翩白馬將手把青絲挑少小事邊徼斬刈輕茶蓼殿前賜鞍勒
珂月明皎皎自言得所事強暴無不了廟筭本詩書下策禁焚燎

當令百鍊剛甘就一指繞低回未嘗試坐被世人少秋霜一朝下
凌厲見鷲鳥爲君整驕倚重立穰苴表

送鮮于子駿還朝兼簡范景仁

蜀中耆舊今無幾相逢握手堪流涕勸遊潦倒不還家舊俗陵遲
眞委地錢荒粟帛賤如土權峻茶鹽不成市詩書鄉校變古法節
行故人安近利欲歸長恐歸不得歸去相歡定誰是低徊有似羊
觸藩眷戀僅同雞擇米中山先生昔所愛南都攝尹私相喜窮冬
夜長一事無燈火相從夜深睡讀書萬卷老不廢感寓百篇深有
意俗吏惟知畏簡書窮途豈意逢君子春風歸騎忽西顧平日高

談應且止朝騎疋馬事朝謁莫就一床尋夢寐猶有城西范蜀公
買地城東種桃李花絮飛揚酒滿壺談笑從容詩百紙紅塵暗天
獨不知白首相看兩無愧古人避世金馬門何必柴車返田里

次韻素觀見寄

東家有賢人西家苦相忽幽蘭委冰霜掩靄特未發春風限芳蕤
爛漫安可沒東南信多士人物世不闕考槃溪山間自獻恥干謁
誰憐幽閒女艷色比南越垂耳困鹽車捐金空買骨讀書謝世事
閉門動論月予生亦羈旅處世常卒卒誰令釣竿手強復此持笏
惟餘七尺軀空洞中無物時蒙好事過解榻聊一拂野情樂江海

夢想扁舟兀隱居便醉睡世路多顛蹶榮華一朝事毀譽百年欲
相勸沐咸池陽阿晞汝髮

次韻道潛見寄

蕭蕭華髮映衰容慙愧高僧歎不逢遊宦終身空處處塵埃何日
退重重已甘憔悴雞羣鶴猶勝劬勞旱歲龍回首不堪膏火熱試
求甘露洒青松

次韻王鞏元日

庭鵲營巢初一枝餘寒未便夾羅衣春風娜娜還吹霰歲事駸駸
已發機上國遨遊誰信老中年情味祇思歸和詩應覺添新懶過

盡長空鴈北飛

送將官歐育之徐州

輕衫駿馬走春風未識彭城氣象雄
青山只在白門外明月盡屬黃樓中
五斗濁醪消永日一雙鳴鏑戲晴空
歸來笑殺幕府客閉戶看書滴滴窮

次韻答王鞏

君家當盛時畫戟擁朱戶中書十八年
清明日方午形容畫雲閣功業載盟府
中庭三槐在遺迹百世睹子孫盡豪俊
豈類世寒窶胡爲久遭厄黽俛受侵侮
往來兩都間奔走未安土願言解纓紱

歸去事農圃嘉禾根未拔且忍俟甘雨拂衣走東臯此語吾不取
聊復放襟懷清談對僧麈躬耕未可言知田顧乃父

次韻子瞻過淮見寄兼簡孫奕職方三首

出處平生共江淮恨不來宦遊良誤我老病賦懷哉狗物終今世

量書盡幾堆歸耕少憂患惟有仰春雷

蜀中謂田無水利者爲雷鳴田

其二

龜山昔同到松竹故依然紅印封鹹鼓黃罌分并泉青天攜杖處
晚日落帆偏無限相思意新詩句句傳

其三

行役饒新喜臨川逢故人相看對泉石憐我在埃塵會合終多故
分張類有神南遊得如願夢想雲溪春

次韻王鞏畱別

決策歸田豈世情網羅從此脫餘生請君速治雞黍具待我同爲
沮溺耕秋社相從釀錢飲日高時作叩門聲茅廬但恐非君處籍
籍朝中望已傾

次韻答孔武仲

白髮青衫不記年相逢一笑豐欣然誦詩疊疊鋸木屑展卷駸駸
下水船未肯尺尋分枉直日知鑿柄有方圓閑官更似楊州學猶

得昏昏晝日眠

送傅宏著作歸覲待觀城闕

膠西前輩鄭康成千載遺風及後生舊學詩書儒術富兼通法律
吏能精還家綵服頻爲壽得邑河壩喜有兵民事近來多迫促弦

歌聊試武城聲

律有鄭氏章句

連雨不出寄張恕

麥熟蠶繅熱似烝雨傾三尺未爲淫洗清溝澮蚊蟲靜沒盡蒲蓮
沼沚深遺秉滿田驚朽腐移牀避漏畏侵尋高閑祇有張公子臥
聽蕭蕭打葉音

和子瞻自徐移湖將過宋都途中見寄五首

東武厭塵土彭門富溪山從兄百日畱退食同躋攀輕帆過百步
船底驚雷翻肩輿上南麓眼界涵川原愛此忽忘歸願兄且三年
我去已怱怱兄來亦崩奔永懷置酒地遶郭多雲烟

我昔去彭城明日河流至不見五斗泥但見三竿水驚風鬱颺怒
跳沫高睥睨激灑三月餘浮沉一朝事分將食魚鼈何暇顧隣里
悲傷念遺黎指顧出完壘繚堞對連山黃樓麗清泗功成始逾歲
脫去如一屣空使西楚氓欲語先垂涕

千金築黃樓落成費百金誰言史君侈聊慰楚人心清秋吐明月

白壁懸青岑，晃蕩河漢高。恍恨窗戶深，邀我三日飲。不去如籠禽，史君今吳越。雖往將誰尋。

欲買兩家田，歸種三頃稻。因營山前宅，遂作泗濱老。竒窮少成事，飽暖未應早。願輸橐中裝，田家近無報。平生百不遂，今夕一笑倒。它年數畝宮，懸知迫枯槁。

梁園久蕪沒，何以奉君遊。故城已耕稼，臺觀皆荒邱。池塘塵漠漠，鴈鷺空遲留。俗衰賓客盡，不見枚與鄒。輕舟舍我南，吳越多清流。

次韻劉貢父登黃樓懷子瞻二首

青山開四面，白水繞三畝。野闊時聞籟，人閑舊據梧。畫船留上客，遺迹問田夫。事少日常飲，才疎世未須。決河初薦至，勝事偶相俱。

燕子卑無取勝王遠可樵飛濤隱睥睨落日麗浮圖同舍新持節
專城敢遽呼未迎行部駕已放下淮艫試問登消暑如何楚與吳

吳興有

消暑樓

再和

藹藹才名世駸駸日轉禺一時同接浙平昔共棲梧攬轡真壯士
擁旄良丈夫塵埃脫緇綬水石慰霜須勝地來相失清樽未暇俱
射餘空見帖鑄罷祗觀樵歸計何當決徂年貴早圖檻中終爲食
鞬上耻聞呼顧我千羊羣平生一釣艫微官不須滿也復試遊吳

陪杜克張恕鴻慶宮避暑

至後雨如瀉晴來熱更多簿書霑汗垢巖石思藤蘿賴有祠宮靜
時容俗客過老郎無不可公子亦能和道勝還相接禪迷屢見訶
清涼生絕念煩暑散沉痾古木便張幙鳴禽巧當歌桃香呈絳頰
瓜熟裹青羅飯細經脣滑茶新到腹過劇談時自笑飽食更無它
適意未應厭後遊眞若何官居鄰曲沼田畎助清波晚照明疎柳
微風響眾荷輕舟尙可載小雨試漁蓑

宋城宰韓秉文惠日鑄茶

君家日鑄山前住冬後茶芽麥粒麤磨轉春雷飛白雪甌傾錫水
散凝酥谿山去眼塵生面簿領埋頭汗匝膚一啜更能分幕府定

應知我俗人無

次前韻

龍鸞僅比閩團醞鹽酪應嫌北俗麤採愧吳僧身似腊點須越女
手如酥舌根遺味輕浮齒腋下清風稍襲膚七盃未容畱客試瓶
中數問有餘無

答孔武仲

飛霜委中林不廢長松綠驚風振川野未省勁草伏我貧客去盡
君來常不速愧君贈桃李永願報瓊玉我性本山林苦學筆空秃
驂駟塞康莊病足顧難逐錦文銜華藻敝褐非所續家有五車書

恨不十年讀濟南昔相遇我齒三十六談諧傾蓋間還往白首熟
從君飲濁酒過我飯脫粟西湖多藜藿白晝下鴻鵠城西野人居
柴門擁修竹後車載鴟夷下馬瀉醞醪醉眠臥荒草空洞笑便腹
踈狂一如此豈望世收錄別來今幾何歸期已屢卜西南有薄田
茅舍清溪曲耕耘三男子伏臘當自足君能遠相尋布衣巾一幅

送吳思道道人歸吳興二絕

一去吳興十五年東歸父老幾人存惠山唯有錢夫子一寸閒田

曉日瞰

遨遊海上冀逢人宴坐山中長閉門去住只今誰定是相逢一笑

各無言

次韻答陳之方祕丞

南山李將軍疋馬獨行獵田中射虎豹後騎不容躡丈夫貴自遂
老大饒驚懾飄搖天地間自視如一葉故人多東南願作扁舟涉
忽蒙長篇贈幸此傾蓋接時世尙新奇詩書存舊業南風吹清汗
西去無停楫恨不畱君談一使眾坐厭新詩苦清壯欲和再三怯
東都多名卿投刺日盈笈一言苟合意富貴出旬浹行看文石階
高談曳長裾辱贈但茫然知君念疲薶

登南城有感示文務光王適秀才

幽憂隨秋至秋去憂未已城南試登望百草枯且死落葉投人懷
驚鴻四面起所思不可見欲往將安至斯人定誰識顧有二三子
清風皎冰玉滄浪自前洗竊脂未嘗穀南箕儻微似網羅一張設
投足遂無寄田深狡兔肥霜降鱸魚美造形悼前失式微慙往士
憧憧邛邛道歲晚嗟未止西山有茅屋鋤耰本吾事

張公生日

是歲己未初致仕

少年談王霸英氣干斗牛中年事軒冕徇世仍多憂晚歲探至道
眷眷懷林邛今年乞身歸始與夙昔酬高秋過生日真氣茲一周
觀心比孤月視世皆浮漚表裏一融明萬物不能留顧謂憧憧人

斯樂頗曾不嗟我本俗士從公十年遊謬聞出世語俛作籠中囚
俯仰迫憂患欲去安自由問公昔年樂孰與今日優山中許道士
非復長史儻腹中生梨棗結實從今秋

次韻答張耒

客舟逝將西日夜西北風維舟罷行役坐令鬢如蓬偶從二三子
步上百尺臺雲烟遍原隰敞悅令人哀山中難久居浮沉在城郭
欲學揚子雲避世天祿閣浮木寄流水行止非所期何須自爲計
水當爲我移外物不可必惟此方寸心中樂事手付瑟與琴
夜吟感秋詩惜此芳物零幽人亦多思起坐再三聽白駒在空林

鉗罄有耻曩盡我一杯酒愁思如雲頽

次王適韻送張耒赴壽安尉二首

綠髮驚秋半欲黃官居無處覓林塘浮生已是塵勞侶病眼猶便
錦繡章羞見故人梁苑廢夢尋歸路蜀山長憐君顧我情依舊竹
性蕭疎未受霜

魏紅深淺配姚黃洛水家家自作塘遊客賈生多感槩閑官白傅
足篇章山分少室雲烟老宮廢連昌草木長路出嵩高應少駐屨
顏新過一番霜

次韻張耒見寄

相逢十年驚我老雙鬢蕭蕭似秋草壺將未洗兩腳泥南轅已向
淮陽道我家初無負郭田茅廬半破蜀江邊生計長隨五斗米飄
搖不定風中烟茹蔬飯糗不願餘茫茫海內無安居此身長似伏
轅馬何日還爲縱壑魚憐君與我同一手微官骯髒羞牛後請看
插版趨府門何似曲肱眠甕牖中流千金買一壺櫝中美玉不須
沽洛陽榷酒味如水百錢一角空滿盂縣前女兒翠欲滴吏稀人
少無晨集到官惟有懶相宜臥看南山春雨濕

次韻王適兄弟送文務光還陳

三君皆親非復客執手河梁我心惻倚門耿耿夜不眠挽袖忽忽

有難色君歸使我勞
覓夢落葉鳴堦自相擁
君家西歸在新歲
此行未遠心先恐
故山萬里知何許
我欲因君亦歸去
清江髣髴釣魚船
脩竹平生讀書處
青衫白髮我當歸
咀噍式微慙古詩
少年勿作老人調
被服榮名慰所思

次韻張芻諫議燕集

淮陽臥閣生清風
梁園坐嘯囹圄空
不知何術解髑髏
但覺羈客忘樊籠
樽鼻灑落談笑地
塵埃脫去文書聚
清心漸欲無一事
少年空記揮千鍾
近傳移鎮股肱郡
復恐入覲明光宮
人生聚散不可料
一杯相屬時方冬
浮陽似欲作飛霰
想見觀闕瓊花中
孝王

會集猶可繼莫嫌作賦無枚翁

聖民昔知陳州
余嘗從之遊矣

臘雪五首

長恐冬無雪今朝忽暗空細聲聞
蔌蔌遠勢望濛濛濕潤猶兼雨
傾斜半雜風豐登解多事歡喜助三農

其二

驕陽不能久密雪自相催急霰初鳴瓦
飛花旋集臺着人消瘴疫
覆麥長根荻欲試樽中物門前問客來

其三

久有歸耕意西山百畝田雪來殊不惡
酒熟自相便一被簪裳裏

長遭羅網牽飛翼，迫殘臘愁思渡今年。

其四

憂愁不可緩，風雪故相撩。試問五斗米，能勝一束樵。耕耘終亦飽，哺啜定誰邀。寒暑不須避，傾危且自遙。

其五

雪霜何與我，憂思自傷神。忠信亦何罪，才名空誤身。歸來聊且止，老去莫逢嗔。樽酒它年事，相看醉此晨。

次韻王適雪晴復雪二首

驕陽得一雪，踰尺應更好。晨興視窗隙，驚見晴霞杲。九衢無停迹，

狼籍須一掃空餘浩然氣凜凜接清昊餘寒薄虛室一靜解羣燥
晨炊晚未供客饋慙草草試脫身上衣行問酒家保孤吟擊槁木
大笑稱有道人人生但如此富貴何用禱所思獨未見耿耿屬懷抱

其二

同雲自成幄飛雪來無根一爲清風卷坐見東方曦重陰偶復合
飛霰滿南軒油然青春意已見出土萱老病一不堪惟恃濁酒溫
開戶理松菊掃蕩無遺痕卷舒朝夕間誰識造化元乾坤本何施
中有神怪奔萬物極毫末顛倒何足掀老農但知種荷鋤理南園

送呂由庚推官得替還洛中二首

君家相國舊元勳凜凜中丞繼後塵談笑二年同幕府風流一倍
愈它人南都去後少佳客西洛歸來多老臣我亦宦遊無久意它
年松竹許相鄰

洛水畱人一向乾雪泥溢路十分寒送行我豈無樽酒多難君知
久鮮歡回首祇應憐老病凌風爭看試輕翰到家定見嵩陽老問

我衰遲未解官

司馬君實提舉
嵩山嵩福宮

四十一歲歲莫日歌

小兒不知老人意賀我明年四十二人生三十百事衰四十已過
良可知少年讀書不曉事坐談王霸了不疑脂車秣馬試長道一

日百里先自期不知中途有陷穿山高日莫多棘茨長裾大袖足
鉤挽卻行欲返筋力疲蝮虵當前猛虎後脫身且免充朝饑歸來
掩卷淚如雨平生讀書空自誤山中故人一長笑布衣脫粟何所
苦古人知非不嫌晚朝來聞道行當返四十一歲不可言四十二
歲聊自還

次韻子瞻繫御史獄賦獄中榆槐竹栢

秋風一何厲吹盡山中綠可憐凌雲條化爲樵夫束凜然造物意
豈復私一木置身有得地不問直與曲青松未必貴枯榆還自足
紛然落葉下蕭條愧華屋

右榆

盛衰日相尋循環何曾歇
攀條柔荑回首驚脫葉
綠槐陰最厚零落今存莢
千林一枯槁平地三尺雪
草木何足道盈虛視新月
微陽起泉下生意未應絕

右槐

故園今何有猶有百竿竹
春雷起新萌不放牛羊觸
雖無朱欄擁不見紅塵辱
清風時一過交夏響鳴玉
淵明避紛亂歸嗅東籬菊
嗟我獨何爲棄此北窗綠

右竹

曲如山下藤脆若溪上葦春風一張王秋霜死則已胡爲南澗中
辛勤種栢子上枝撓雲霓下根絞石齒伐之爲梁棟歲月良晚矣
白首閱時人君看柱下史

右栢

次韻子瞻贈張慙子

得罪南來正坐言道人閉口意深全天遊本自有真樂羿殼誰知
定不賢構火瞰瞰初吐日飛流滾滾旋成川此心此去如灰冷肯
更逢人問復然

過龜山

再涉長淮水驚呼十四年龜山老僧在相見一茫然僧老不自知
我老私自憐驅馳定何獲少壯空已捐掉頭不見答笑指岸上船
人生何足云陵谷自變遷當年此山下莫測千仞淵淵中械神物
自昔堯禹傳帆檣避石壁風雨隨香烟爾來放冬汴冷沙漲成田
褰裳六月渡中流一帶牽俯首見砂礫羣漁捕魴鱸父老但驚歎
此理未易原何況七尺軀不爲物所旋眾形要同盡獨有無生全
百年爭奪中擾擾誰相賢

放閘二首

畫舫連檣住清流汎閘平忽看銀漢落仍聽夏雷驚正柂遲迴久

開頭取次輕滯畱初一快奔駛忽如傾不識風濤恐聊同枕席行
行逢賤魚稻飽食慰平生

其二

聞空非有礙水靜爲誰興開閉偶然異喧逐自不勝淵停初鏡淨
勢轉忽雲崩脫隘尙容與投深益沸騰玉山紛破碎陳馬急侵陵
挾版千鈞重浮舟萬斛升岸搖將落木魚困或投罾洶湧曾誰止
蕭條遠欲凝力爭知必折少待亦何能一發臨流笑微言早服膺

次韻王適細魚

羣魚一何微僅比毛髮大嬉遊極草草鬢鬣自箇箇造物賦羣形

偶然如一唾吞舟雖云巨其樂不相過若言無性靈還知避船柁

高郵別秦觀三首

濛濛春雨濕邗溝篷底安眠晝擁裘知有故人家在此速將詩卷
洗閑愁

筆端大字鴉棲壁袖裏清詩句琢冰送我扁舟六十里不嫌罪垢
汙交朋

高安此去風濤惡猶有廬山得縱遊便欲攜君解船去念君無罪
去何求

召伯埭上斗野亭

細雨添春色微風淨牖流徂年半今世生計一扁舟
飲食隨魚蟹封疆入斗牛江波方在眼轉覺此生浮

次韻鮮于子駿遊九曲池

天高山近海春盡草生池禾黍多新恨川原自昔時
花存故苑麗樵出舊城隳莫望瓜洲渡曾經駐佛狸

楊州五詠

九曲池

嵇老清彈怨廣陵隋家水調繼哀音可憐九曲遺聲盡
惟有一池春水深鳳闕蕭條荒草外龍舟想像綠楊陰
都人似有興亡恨每

到殘春一度筭

平山堂

歐陽永叔所建

堂上平看江上山
晴光千里對憑欄
海門僅可一二數
雲夢猶吞八九寬
簷外小棠陰蔽芾
壁間遺墨涕洟瀾
人亡坐使風流盡
遺構仍須子細觀

蜀井

在大明寺

信脚東遊十二年
甘泉香稻憶歸田
行逢蜀井恍如夢
試煮山茶意自便
短綆不收容盥濯
紅泥仍許置清鮮
早知鄉味勝爲客
遊宦何須更着鞭

摘星亭

迷樓舊址

關角孤高特地迷迷藏渾忘日東西江流入海情無限莫雨連山
醉似泥夢裏興亡應未覺後來愁思獨難齊只堪畱作遊觀地看
遍峰巒處處低

僧伽塔

山頭孤塔闕真人云是僧伽第二身處處金錢追晚供家家蠶麥
保新春欲求世外無心地一掃胸中累劫塵方丈近聞延老宿清
朝畱客語逡巡

題杜介供奉熙熙堂

門前籍籍草生徑堂上熙熙氣吐春遮眼圖書聊度日放情絲竹
最關身年來馮脫烏皮几客去時乾漉酒巾卜築城中移榜就休
心便作廣陵人

遊金山寄楊州鮮于子駿從事邵光

揚州望金山隱隱大如幞嵒來長江上孤高二千尺僧居厭山小
面面貼蒼石虛樓三百間正壓江湖白清風斂霽霧曉日曜金碧
直侵魚龍居似得鬼神役我行有程度欲去空自惜風吹渡江水
山僧午方食波瀾洗我心筍蕨飽我腹平生足遊衍壯觀此云極
鐵甕本誰安海門復誰植東南遞隱見遙與此山匹茲遊幾不遂

深愧幕府客歸時日已暮正值江月黑顧視天水并坐恐星斗濕
使君何時罷登覽不可失

初至金陵

山川過雨曉光浮初看江南第一州路繞匡廬更南去懸知是處
可忘憂

樂城集

樂城集卷之十

宋眉山蘇轍子由著

明東吳

王執禮子敬
顧天敘禮初

仝校

詩九十六首

和孔武仲金陵九詠

白鷺亭

白鷺洲前水奔騰亂馬牛亭高疑欲動船去似無憂
洶湧山方壞澄清練不收中秋誰在此明月滿城頭

覽輝亭

城裏最高處坡陀見一城山多來有緒江遠靜無聲歌吹風前度
樓臺雨後明風光同楚蜀聊此慰平生

鳳凰臺

鳳鳥久不至斯臺空復高何年種梧竹特地剪蓬蒿白水來無際
青山轉幾遭南遊且未返江海共滔滔

天慶觀

興廢不可必冶城今靜祠松聲聞道路竹色淨軒墀江近風雲改

亭深草木滋孤墳弔遺直狂閹閔元規

卞壺墓
在觀側

高齋

金陵佳處自無窮使宅幽深即故宮樓殿六朝遺燼後江山百里
舊城中雨餘尚有金銅落月出長窻粉堞空看盡一城懷古地茲
遊恨不與君同

此君亭 在華藏寺

綠竹不可數孤亭一倍幽色分巖石潤稍出澗松脩雪節寒方見
春萌旱不抽故山多此物長恨未歸休

見江亭 在蔣山

江水信浩渺連山巧蔽虧端能上嶮絕故自識津涯滅沒檣竿度
飄搖鷺羽遲何人倚舟望亦愛此峯危

定林院

定林兩山間崖木生欲合茅屋倚巖隈重重陰清樾晨齋取旁寺
生事信幽絕吾人定何爲常欲依暖熱

八功德水

君言山上泉定有何功德熱盡自清涼苦除卽甘滑頗遭遊人病
時取破匏挹煩惱雖云消凜然終在臆

遊鍾山

江南四月如三伏北望鍾山萬松碧杖藜試上寶公龕眾壑秋聲
起相襲青峯回抱石城小白練前橫大江直石梯南下府城闔松

徑東蟠轉山谷喬林無風聲如雨時見遊僧石上息行窮碧澗一
庵巖坐弄清泉入功德歸尋晚飯眾山底困臥定林依石壁朝遊
不知澗谷遠莫歸但覺穿雙屐老僧一身泉上住十年掃盡人間
迹客到惟燒栢子香晨飢坐待山前粥丈夫濟時誠妄語白首居
山本良策茹蔬飯糗何足道純灰洗心聊自滌失身處世足愆尤
愧爾山僧少憂責

郭祥正國博醉吟庵

姑熟溪頭醉吟客歸作茅庵劣容席團團鵠卵中自明窗前月出
夜更清醉吟自作溪上語不學擁鼻雒陽生詩成付與坐中讀知

有清溪可終日作詩飲酒聊復同誰來共枕溪中石圓天方地千
萬里中與此間大相似囂然一息不自停水火雷風相滅起直須
只作此庵看歌罷曲肱還醉眠不用騎鯨學李白東入滄海觀桑
田

湖陰曲

老虎穴中臥獵夫不敢窺驕驕服箱驂盜驅巡城三匝漫不知帳
中晝夢日繞壁驚起知是黃須兒馬鞭七寶雷道左猛士徘徊不
能過遺矢如冰去已遙明日神兵下赤霄荒城至今人不住狐兔
驚走風蕭蕭

舟次大雲倉回寄孔武仲

一風失前期十日不相見君帆一何駛去若乘風箭我舟一何遲
出沒蔽葭亂甕中有白糟床上有黃卷妻孥不足共思子但長歎
池陽重相遇撫手成一粲先行復草草回首空眷眷人生類如此
遲速亦何算一見誠偶然四海良獨遠相期廬山陰把臂上雲巘

池州蕭丞相樓二首

遶郭青峯睥睨屯入城流水縠文翻樓成始覺江山勝人去方知
德業尊坐久浮雲霾後嶺酒醒飛雪變前村我來邂逅公歸國猶

喜登臨共一樽

池守滕元發
時將解去

丞相風流直至今朱欄仍對舊山林
軒冕終何有跌宕圖書意最深松繞城頭風瑟縮江浮山外
氣陰森三年不起南遷想應有前人識此心

過九華山

南遷私自喜看盡江南山孤舟少僮僕此志還復難局促守破窗
聯翩過重巒忽驚九華峰高拱立我前蕭然九仙人縹渺凌虛烟
碧霞爲裳衣首冠青琅玕揮手謝世人可望不可攀我行竟草草
安能拍其肩但聞有高士臥聽松風眠松根得茯苓賦若干歲龜
煮食一朝盡終身棄腥羶腹背生綠毛輕舉如翔鸞相逢欲借問
已在長松端何年脫罪罟出處良自便芒鞋拄藤杖逢山卽盤桓

斯人未可求巖室儻復存

佛池口遇風雨

長江五月多風暴欲行先看風日好此風忽作東南來陰雲如湧
撥不開驚雷往還轉車轂狂波低昂起坑谷中流一葉那復持卷
舒已副天公知解帆轉柁不容語佛池口中幸可住須臾急雨變
昏霾柁師喜賀風已回澄溪不動縈白練老木蒼崖蔥蔥舊繫舟
茅屋得青蔬試問釣船還有魚開樽引滿向妻子明日復行未須
怖陰陽開闔良等閑扁舟誰令乘嶮艱

舟次磁湖以風浪留二日不得進子瞻以詩見寄作二篇答

之前篇自賦後篇次韻

慙愧江淮南北風扁舟千里得相從黃州不到六十里白浪俄生
百萬重自笑一生渾類此可憐萬事不由儂夜深魂夢先飛去風
雨對床聞曉鐘

西歸猶未有菟裘擬就南遷買一邱舟楫自能通蜀道林泉真欲
老黃州魚多釣戶應容貰酒熟鄰翁便可畱從此莫言身外事功
名畢竟不如休

黃州陪子瞻遊武昌西山

千里到齊安三夜語不足勸我勿重陳起遊西山麓西山隔江水

輕舟亂鳧鷺連峯多回溪盛夏富草木杖策看萬松流汗升九曲
蒼茫大江湧浩蕩眾山蹙上方寄雲端中寺倚巖腹清泉類牛乳
煩熱須一掬縣令知客來行庖映脩竹黃鵝時新煮白酒亦近熟
山行得一飽看盡千山綠幽懷苦不遂滯念每煩促歸舟浪花暝
落日金盤浴妻孥寄九江此會難再卜君看孫討虜百戰不搖目
猶憐江上臺高會飲千斛巾冠墮臺下坐使張公哭異時君再來
攜被山中宿

將還江州子瞻相送至劉郎家泚王生家飲別

相從恨不多送我三十里車湖風雨交

晉車武子故居
其水曰車湖

松竹相披

靡繫舟枯木根會面兩王子嘉眉雖異郡鷄犬固猶爾相逢勿空
過一醉不須起風濤未可涉隔竹見奔駛渡江買羔豚收網得魴
鯉朝畦甘瓠熟冬盎香醪美烏菱不論價白藕如泥耳誰言百口
活仰給一湖水奪官正無賴生事應且爾卜居請連屋扣戶容龐
履人生定何爲食足眞已矣愆尤未見雪世俗多相鄙買田信良
計蔬食期沒齒手持一竿竹分子長湖尾

赤壁懷古

新破荊州得水軍鼓行夏口氣如雲千艘已共長江嶮百勝安知
赤壁焚觜距方強要一鬪君臣已定勢三分古來伐國須觀壘意

突成功所未聞

自黃州還江州

身浮一葉返湓城
凌犯風濤日夜行
把酒獨斟從睡重
還家漸近覺身輕
岸回樊口依稀見
日出廬山紫翠橫
家在庾公樓下泊
舟

人遙指岸如頰

江州城下土赤如赭

江州五詠

射蛟浦

萬騎巡遊遍千帆
破浪輕射蛟江水
赤教戰越人
驚山轉樓船影
岸摧連弩聲
祈招無爲賦
酣寢盡平生

浦上積水相傳漢武教樓船於此

浪井

江波浮陣雲岸壁立青鐵胡爲井中泉湧浪時驚發水性本無定
得止自澄澈誰爲女媧手補此天地裂

庾樓

元規情不薄上客有殷生夜半酒將罷公來坐不驚舞翻江月迥
談落塵毛輕塵世風流盡高樓空此名

東湖

讀書廬山中作郡廬山下平湖浸山腰雲峯對虛榭紅葉紛欲落
白鳥時來下猶思隱居勝亂石驚湍瀉

李勃隱居廬山泉石奇勝
今棲賢寺其故居也及爲

九江太守始營
東湖風物可愛

琵琶亭

湓江暮雨晴孤舟
暝將發夜聞胡琴語
展轉不成別草堂
寄東林雅意存北闕
潸然涕泗下安用無生說

不到東西二林

山北東西寺高人
永遠師來遊亦前定
回首獨移時社散
白蓮盡山空玄鶴悲
何年陶靖節溪上
送行遲

遊廬山山陽七詠

開先瀑布

山上流泉自作溪行逢石缺瀉虹霓定知雲外波瀾闊飛到峯前
本末齊入海明河驚照曜倚天長劍失提攜誰來臥枕莓苔石一
洗塵心萬斛泥

漱玉亭

山回不見落銀潢餘溜喧厯響石塘目亂珠璣濺空谷足寒雷電
繞飛梁入瓶銅鼎春茶白接竹齋厨午飯香從此出山都不棄滿
田秔稻插新秧

簡寂觀

山行但覺鳥聲殊漸近神仙簡寂居門外長溪淨客足山腰苦筍

助盤蔬喬松定有藏丹處大石仍存拜斗餘弟子蒼髯年八十養
生世世授遺書

歸宗寺

來聽歸宗早晚鐘疲勞懶上紫霄峯墨池漫壘溪中石白塔微分
嶺上松佛宇爭推一山甲僧厨坐待十方供欲遊山北東西寺巖

谷相連更幾重

此寺王逸少所置
云有墨池在焉

萬杉寺

萬木青杉一手栽滿堂白佛九天來

仁宗初年有僧手種萬杉特
爲建此寺仍以禁中佛賜之

涓涓石溜供厨足轟轟山屏遶寺開半榻松陰秋簟冷一杯香飯

午鐘催安眠飽食平生事不待山僧喚始迴

三峽石橋

三峽波濤飽派沿過橋雷電記當年江聲髣髴瞿唐口石角參差
灑瀕前應有夜猿啼古木已將秋葉作歸船老僧未省遊巴蜀松
下相逢問信然

白鶴觀

五老相攜欲上天玄猿白鶴盡疑仙浮雲有意藏山頂流水無聲
入稻田古木微風時起籟諸峯落日盡生烟歸鞍草草還城市慙
愧幽人正醉眠

南康阻風遊東寺

欲涉彭蠡湖南風未相許扁舟厭搖蕩古寺慰行旅
重湖面南軒驚浪卷前浦霏微雪陣散顛倒玉山舞
一風輒九日未悉土囊怒百里斷行舟仰看飛鴻度
故人念征役一飯語平素竹色淨飛濤松聲亂秋雨
我生足憂患十載不安處南北已兼忘遲速何須數

寄題陳憲郎中竹軒

家有修篁綠滿軒趨庭詩禮舊忘言凌霜自得良朋友
過雨時添好子孫試翦輕筠扶野步旋收涼葉煮清樽
風流共道勝桑梓鄰里何妨種百根

次韻孔武仲到官後見寄

舉楫同千里繫舟時一言共嗟蓬作屋願就席爲門行役身先困
征商思益昏僅同登壘斷何止服車轅

次韻筠守毛維瞻司封觀修城三首

北垣荆棘舊成堆畱待公來次第開車馬已通城下路榛蕪盡付
冶家灰異時碧瓦千門合應記紅旌百度來自笑裨謀便曠野肩
輿飛蓋許追陪

撥棄案頭文字堆曉晴山色四門開究懷民事老雖壯俛首山城
心已灰荆棘燒殘桑柘出狐狸去盡犬鷄來規模先遣通蹊隧後

乘應容眾客陪

山腳侵城起阜堆，遶城徼道斬新開。
闔閭半壞驚潮信，隍壑初深見劫灰。
蟻聚千夫曾幾日，鱗差萬瓦看將來。
史君才力輕山郡，朝論行聞急召陪。

次子瞻夜字韻作中秋對月二篇一以贈王郎一以寄子瞻
平明坐曹黃昏歸終歲得閑惟有夜已邀
明月出牆東更遣清風掃庭下
城上青鬢四山合門前白練長
江瀉誰家高會吹參差鄰婦悲歌春罷亞
二年憂患今已過一夜清光天所借
西京詩句出蘇李南國風流數
王謝已隨孤棹去中原肯顧新科求
上舍讀書

本自比嵇鍛學劍要須問曹蔗清觴灑灑君莫違佳句駸駸予已
怕狂夫猖狂終累人不返行遭親黨罵

十年秋月照相思相從祇有彭門夜露侵笳鼓思城關寒迫魚龍
舞潭下厭厭夜飲歡自足落落襟懷向人瀉秋深河來巨野溢水
乾樓起滕王亞北海孔公雖好客河內寇尹那得借是非朝野忽
紛紜得喪芳菲一開謝明月多情還入門流水何知空繞舍晨餐
江市富鱸魴夜宿山村足梨蔗坐隅鵬鳥不須問牆外蝮蛇猶足
怕婁公見唾行自乾馮老尙多誰定罵

次韻王適食茅栗

相從萬里試南餐對案長思苜蓿盤山栗滿籃兼白黑村醪入口
半甜酸久聞牛尾何曾試竊比雞頭意未安故國霜蓬如盤大夜
來彈劍似馮驩

過毛國鎮夜飲

風格照人華省郎江山遶郭古仙鄉漫傳鉛鼎八百歲未比金釵
十二行不動歌聲人已醉旋聞詩句夜初長簿書撥盡知餘力造
院清虛頃未嘗

次韻毛國鎮趙景仁唱和三首一贈毛一贈趙一自詠

治劇從容緩策衙鈴軒無事日清談隼旗畫戟明千里紙帳繩床

自一菴金奏屢陳容客和玉山不動看賓酣我來邂逅逢寬政忘
卻漂流身在南

一紙新詩過雁銜醒然何異接君談奉親魚蟹兼臨海退食琴書
定有菴一別經年眞似夢多憂不飲亦如酣共君友契非今日蔽
芾棠陰自劍南

遠謫江湖舳尾銜到來辛苦向誰談畏人野鶴長依嶺厭事山僧
祇住菴黃雀頓來成一飽白醪新熟喜初酣疎頑近日尤堪笑坐
任飄風去自南

再和三首

穴鼠何須竄數銜，麤官不用苦高談。
夜傾綠蟻風吹竹，晝擁黃紬雪覆菴。
每作微詞還自笑，偶慚餘潤亦成酣。
公詩精絕非倫擬，自古騷人盡在南。

燕巢泥土一春銜，慙愧封侯止立談。
舊隱尚聞存竹徑，歸休但要葺茅菴。
釣船夢想沿溪泛，酒盞遙思向日酣。
強欲遲留依幕府，吳公行恐召河南。

天教窮困欲誰銜，生事那須一一談。
自笑豐年塵滿甑，不堪雨後菌生菴。
士師憔悴經三黜，陶令幽憂付一酣。
他日歸耕苦相憶，尺書頻寄北山南。

次韻王適州學新修水閣

昔童巨挺兩春容何幸幽居近學宮坐對江山增浩氣力追齊魯
欲同風頌詩聞道求何武家法行看試左雄欲伴少年遊矍相奔
軍慚愧恐詞窮

次韻毛君九日

山腳侵城盡是臺登高處處喜崔嵬手拈霜菊香無奈面拂江風
酒自開幕府尊疊雲裏集民家歌吹靜中來定知勝卻陶彭澤悵
望籬邊白日頽

次韻毛君感事書懷

種棠經歲便成科，秋雨調勻氣漸和。
才力有餘嫌事少，風情無限覺詩多。
長松更老仍添節，古井雖深自不波。
宴坐山房人豈識，一尊聊且慰蹉跎。

次韻毛君見督和詩

新詩落紙一城傳，顧我疎蕪豈足編。
他日杜陵詩集裡，韋迢略見兩三篇。

次韻毛君山房遣興

欲就陽崖暖，新開石磴斜。
誰言太守宅，自是野人家。
燕坐收心鑑，冥觀閱界沙。
退公長寂寞，外物自喧譁。
缺逕移松補，斜陽種竹遮。

白雲生後礎孤鶩伴殘霞破悶時尋鶴呼眠亦任鴉喜聞糟出甕
屢問菊開花古井元依斗丹砂舊養芽蚍蜉頻上案猿狖巧分樞
客到扁舟遠年侵兩鬢垂心搖挂風旆眼暗隔輕紗強撥橫肱睡
來從插版衙隱居慙棄擲勝地每咨嗟頑鈍終何取彫磨豈復加
焦先風所尙園舍恰如蝸

和胡教授蒙太守策試諸生

著籍初同闕里多采芹先致魯風和欲將大策觀胸膽盡召中堂
列雁鵝終日正言何忌諱幾人餘力尙委蛇豈惟太守知爲政仍
見先生善設科

和毛君州宅八詠

鳳凰山

山川蟠踞偶成形
威鳳低回久未行
更種梧桐真可致
高飛性似伯夷清

披仙亭

仙翁舊住蜀江邊
千歲歸來一鶴翩
城郭已非人事改
淒涼遺迹但披仙

方沼亭

池上茅簷覆水低
早來秋雨尙虹霓
敗荷折葦飛鴻下
正憶漁舟

泊故溪

翠樾亭

一夜飛霜點綠苔
曉庭黃葉掃成堆
簷間翠樾彫疎盡
卻放牆東好月來

李八百洞

洞府山川百里賒
洞門藤蔓鎖烟霞
神仙不與人間異
弟妹還應共一家

煉丹井

鑿井燒丹八百年
塵緣消盡果初圓
石床蘚甃人安在
綠水團團

一片天

磨劍池

神仙鑄劍本無硯岸古班班尚鐵銖天上少年仍狡獪不須還爾對方平

山房

岸幘攜筇夜夜來蒲團紙帳竹香臺直須覓取僧爲伴更爲開菴斲草萊

次韻毛君病中菊未開

病肺秋深霧雨傷舊繪故絮喜清涼菊花金粟未曾吐桂酒鵝兒

空自黃草木亦知年有閏風霜漸近月方陽
十月爲陽月得詩聞道終
摩病欲到毘耶言已忘

雨中宿酒務

微官終日守糟缸風雨淒涼夜渡江
早歲謬知儒術貴安眠近喜
壯心降夜深唧唧酷鳴菱睡起蕭蕭葉打窗
阮籍作官都爲酒不
須分別恨南邦

次韻毛君經旬不用鞭朴

共喜秋深酒未醇官曹休假不須旬
政寬境內棠陰合訟去庭中
草色新不惜牛刀時一割已因麤鼠發
千鈞歲終誰爲公書考豈

止江西第一人

次韻李撫辰屯田修州門

六月江濤壁壘頽蒼崖翠壁就新臺
咄嗟雙闕還依舊咫尺羣山
信有材畫戟風生兩衙退飛橋日出萬人來
不因毀圯催興築誰
見雍容治劇才

飲酒過量肺疾復作

朝蒙翹塵居夜傍糟床臥鼻香黍麥熟眼亂瓶罍過囊中衣已空
口角涎虛墮啜嘗未云足盜醕恐深坐使君信寬仁高會慰寒餓
西樓適新成明月猶半破擁簷青山橫拂檻流水播雕槃貯霜實

銀盜薦秋糯共言文字歡豈待紅裙佐惟知醜醜滑不悟頗羅大
夜歸肺增漲晨起脾失磨情懷忽牢落藥餌費調和衰年足奇窮
一醉仍坎珂清尊自不惡多病欲何柰聞公話少年舉白不論箇
歌吟雜嘲諢笑語爭掀簸平明起相視銳氣曾未挫達人遺形骸
鴛馬懷豆莖不知逃世網但解憂歲課不見獨醒人終費招魂些

衢州趙閱道少師濯纓亭

挂冠纓上已無塵猶愛溪光碧照人點檢舊遊黃石在掃除諸念
日鷗親一尊父老囊金盡三逕松筠生事貧他日南公數人物丹
青漆入縣圖新

茶花二首

黃蘗春芽大麥麩傾山倒谷採無餘久疑殘枿陽和盡尙有幽花
霰雪初耿耿清香崖菊淡依依秀色嶺梅如經冬結子猶堪種一
畝荒園試爲鉏

細嚼花鬚味亦長新芽一粟葉間藏稍經臘雪侵肌瘦旋得春雷
發地狂開落空山誰比數烝烹來歲最先嘗枝枯葉硬天真在踏
遍牛羊未改香

次韻毛君山房卽事十首

案牘稀疎意自開夜闌幽夢曉方回青苔紅葉騷人事時見詩筒

去又來

東晉仙人借舊山定應天意許公閒
郡人欲問史君處笑指峯巒
紫翠間

蛩知秋候時鳴壁香礙蒲簾不出門
隱几無言心有得南窗晴日
暖侵軒

溪山付與醉中仙美酒何曾斗十千
就得江邊賤魚稻閑官未用
苦相憐

忘身先要解忘名分別須臾起不平
請看早朝霜入履何如臥聽
打衙聲

禽哢秋來不復圓
桐陰霜後亦成穿
黃花強欲招酣飲
白髮偏工報老年

邂逅清歡屢不期
病來無奈羽觴飛
醉乘籃輿江邊去
長伴漁舟月下歸

醉裡題詩偏韻惡
秋來勸酒益杯深
不才多病俱非敵
綠綺綠何得報金

庵中獨宿雨垂垂
永夜無人欵竹扉
灰冷銅爐香欲滅
床頭一點葛燈微

觸事隨緣不用多
華堂玉食奈憂何
美人未厭山阿陋
薜荔爲裳

帶女蘿

再和十首

澗草巖花日日開
江南秋盡似春回
旋開還落無人顧
惟有山蜂暖尙來

江上孤城面面山
居人也自不曾閑
蜂遊蟻聚知何事
日夜長橋南北間

城郭村墟共水雲
槿籬竹屋映柴門
隱居亦有高人在
岸幘無言倚釣軒

一官疎散自疑仙
三考應成醉日千
早病固須閑地著
多憂長被

達人憐

養生尤復要功圓
瀟瀟南溪石自穿
近見牢山陳道士
微言約我

更三年

牢山陳道士瑛近過此叩之
竟無所云約三年當再見

張公詩社見公名

公昔與張伯達
爲唱和之友

白首山城歎不平
坐客要聞新

樂府應須溢口琵琶聲

高情日與故山期
鴻鵠誰言也倦飛
且聽漁人強哺啜
坐中羈客

畏公歸

天爲多才故欲禁
府門摧落漲江深
鼎新翠壁排精鐵
湧出飛樓

直百金

樓上青山遠四垂畫橋百步引朱扉落成當與公同上一看長江
白練微

歌舞畱賓意自多華燈數問夜如何白頭病客無才思慣臥茅簷
長薜蘿

筠州二詠

牛尾狸

首如狸尾如牛攀條捷嶮如猿猴橘柚爲漿栗爲餽筋肉不足惟
膏油深居簡出善自謀尋踪發窟并執囚蓄租分散身爲羞松薪
瓦甑烝浮浮壓入糟盎肥欲流熊肪羊酪真比儔引筓將舉訊何

尤無功竊食人所仇

黃雀

秋風下黃雀飛禾田熟黃雀肥羣飛蔽空日色薄巡巡百頃禾爲
稀翾翻巧捷多且微精丸妙繳舉輒違乘時席勢不可揮一朝風
雨寒霏霏肉多翅重天時非農夫舉網驚合圍懸頸系足膚無衣
百箇同缶仍相依頭顱萬里行不歸北方居人厭羔豨咀噍聊發
一笑歛

樂城集卷之十一

宋眉山蘇轍子由著

明東吳

王執禮子敬
顧天敘禮初

全校

詩八十六首

和毛君新葺困菴船齋

厭居華屋住東菴
眞味全勝食齋甘
多病維摩長隱几
無心彌勒便同龕
誤遊田舍空成笑
謬入僧房卽欲參
風霽不知吹有萬
月明聊共影成三
齋如小舫才容住
室類空囷定不貪
擁褐放衙人寂寂
脫巾漉酒鬢鬢畫
囊書帙堆窗案
藥裏瓢樽挂壁藍
簷竹

風霜曾不到盆花蜂蝶未全諳公餘野鵲驚初睡賓醉佳人笑劇
談勸客巨觥那得避和詩難韻不容探曉來霏霧連江氣冬後溫
風帶嶺嵐去國屢成還蜀夢忘憂惟有對公酣終身狗祿知何益
投檄歸耕貧未堪借我此庵泥藥竈古書鴻寶試淮南

寒雨

江南殊氣候冬雨作春寒冰雪期方遠蕉絺意始闌未妨溪草綠
先恐嶺梅殘忽發中原念貂裘據錦鞍

積雨二首

山雨無時歇江波上岸流泥深未免出橋斷更堪憂房淺鄰糟甕

宵寒攬絮裘朝來勢未已歸路恐操舟

其二

微陽力尙淺未解破重陰雲氣山川滿江流日夜深凍牙生滯穗
餘潤及重衾泥滓沉車轂農輪絕苦心

戲贈李朝散

江霧霏霏作雪天樽前醉倒不知寒後堂桃李春猶晚試覓酥花
子細看

戲答

銀瓶瀉酒正霜天玉麈生風夜更寒下客不辭投轄飲好花猶恐

隔簾看

臨江蕭氏家寶堂

高人不解作生涯
唯有中堂書五車
竹簡多於孔氏壁
牙籤新似鄴侯家
田園豈是子孫計
青紫今爲里巷誇
富貴早知皆有命
君應未厭十年賒

和蕭刑察推賀族叔司理登科還鄉四首

家聲籍籍大江西
老揮毫捧御題
得意何殊少年樂
還家不惜醉如泥

讀盡家藏萬卷書
蕭然華髮宦遊初
區區獄掾何須愧
聊把春秋

試緒餘

漢儒以春
秋決獄

作官未減讀書勤，簿領從今日日新。
汗簡韋編誰付子，傳家應有下帷人。

巷南諸子足才賢，邂逅相逢秀句傳。
強作短章同寄與，異時見我一依然。

次韻吳厚秀才見贈三首

騷人思苦骨巖巖，百里攜詩相就談。
故作微詞挑遷客，不嫌春雨濕歸衫。
少年舊喜登高賦，老病今成見敵慙。
問我近來誰復可，對君聊擬誦周南。

久欲歸田計未成
羨君負郭足爲生
躬耕不用千鍾祿
高臥誰知萬里征
已覺安閑真樂事
可憐辛苦盡浮名
隱居便作江南計
爲覓佳山早寄聲

一卷新詩錦一端
掉頭吟諷識芳酸
哀歌永夜悲牛角
朗詠扁舟笑杏壇
間發笙簧猶可擬
棄捐斤斧定知難
繼君高韻君應笑
咀嚼歸途久據鞍

次韻毛君燒松花六絕

茅菴紙帳學僧眠
爐爇松花取易然
唯有未能忘酒在
手傾金盞鬪垂蓮

麩雜松黃二月天盤敲松子早霜寒山家一物都無棄狼籍乾花

最後般

蜀人以松黃爲餅甚美

松老香多氣自嚴餘烟勃鬱透疎簾須臾過盡惟灰在借問誰收

一番

去聲炎

美人寒甚懶開扉金作松花插鬢羅幾度低頭疑墮落青烟已斷未消時

枯萼鱗皴不復堅重重正似半開蓮曾經樵舍博爐見未許邦君畫閣然

黃蠟供炊自一家錙銖貧富遞矜誇都城爭買方薪貴卻顧松花

已自奢

陪毛君遊黃仙觀

李叟仙居仍近市黃公道院亦依城定應昔日山林地未有今時
鷄犬聲白鶴翻飛終不返黃冠憔悴只躬耕試從車騎尋遺跡恐
有居人解養生

次韻王適梅花

江梅似欲競新年照水窺林態愈妍霜重清香渾欲滴月明素質
自生烟未成細實酸猶薄半落南枝意可憐誰寫江西風物樣徐
家舊有數枝傳

次韻王適春雪二首

江南春候寒猶劇細雨風吹作雪花中夜窗扉初晃漾平明草木
半低斜潤催江柳排金綠光雜山茶點絳葩老病不堪乘曉出紛
紛能使髮增華

春雪飄搖旋不成依稀履跡散空庭山藏複閣猶殘白日照南峯
已半青

毛君惠溫柑荔支二絕

楚山黃橘彈丸小未識洞庭三寸柑不有風流吳越客誰令千里

送江南

荔子生紅無奈遠陳家曬白到猶難雖無驛騎紅塵起尙得佳人
一笑歡

次韻王適真如寺

江上春雨過城中春草深擾擾市井塵悠悠溪谷心東郊大愚山
自古簷蔔林微言久不聞墜緒誰當尋道俗數百人請聞海潮音
齋罷車馬散萬籟俱消沉新亭面南山積霧開重陰蕭然偶有得
懷抱方悒悒我坐米鹽間日被塵垢侵不知山中趣強作山中吟

次韻王適新燕

好雨纖纖潤客衣新來雙燕力猶微似嫌春早無人見故待簾開

掠地飛南國花期知不遠中原寒劇未應歸養雛不怕巢成早記
取朝朝爲啟扉

官居卽事

官局紛紜簿領迷生緣瑣細老農齊偷安旋種十年木肉食還須
五母鷄對酒不嘗憐酤榷釣魚無術漫臨溪此身已分長貧賤執
爨縫裳愧老妻

陪毛君夜遊北園

池塘草生春尙淺桃李飛花初片片一尊花下夜忘歸燈火尋春
畏春晚春風暗度人不知滿園紅白已離披江南春雨少晴日露

坐青天能幾時折花只恐傷花意攜客就花花定喜落蕊飄香翠
袖中交柯接葉燈光裡雨練風柔雪不如精神炫轉影扶疎夜看
飛燕勝朝日月暗還須明月珠美人勸我殊非惡明日雨來無此
樂醉歸不用怕山公馬上接離先倒著

山橙花口號

故鄉寒食荼蘼發百和香濃村巷深漂泊江南春欲盡山橙髣髴
慰人心

次韻馮弋同年

細雨濛濛江霧昏坐曹聊且免泥奔賣鹽酤酒知同病一笑何勞

賦北門

送王適徐州赴舉

送別江南春雨淫北方誰是子知音性如白玉燒猶冷文似朱弦
叩愈深萬里同舟寬老病一杯分袂發悲吟明年榜上看名姓楊
柳春風正似今

遊吳氏園

細雨作寒晴便暖好風吹袂意初佳清池解洗春心熱紅艷能添
醉眼花紫竹暗生岷岫笋山舟強比洛人家憐渠巧與閑官便申
退來遊未覺賒

江州周寺丞泳夷亭

行過廬山不得上，湓江城邊一惆悵。
羨君山下有夷亭，千巖萬壑長相向。
山中李生好讀書，出山作郡山前居。
手開平湖浸山脚，未肯卽與廬山疎。
道州一去應嫌遠，千里思山夢中見。
青山長見恐君嫌，要須罷郡歸來看。

次韻毛君遊陳氏園

增築園亭草木新，損花風雨怨頻頻。
篔簹似欲迎初暑，芍藥猶堪送晚春。
薄暮出城仍有伴，攜壺藉草更無巡。
歸軒有喜知誰見，道上從橫滿醉人。

江漲

山中三日雨江水一丈高崩騰沒州渚淫溢浸蓬蒿凌晨我有適
出門舟自操中厯已易肆下道先容舸鷄犬萃墳冢牛羊逾圈牢
厨薪散流枿困米爲浮糟臥席不遑卷剝繭仍未縑老弱但坐視
閭里將安逃徙居共擾擾來勢方滔滔嗟余偶同病哀爾爲生勞
晴日慰人願寒風送驚濤藩籬出舊趾羸蚌遺平臯流竄非擇地
艱難理宜遭胡爲苦戚戚一夕生二毛

和子瞻鐵拄杖

截竹爲杖瘦且輕石堅竹破誤汝行削木爲杖輕且好道遠木折

恐不到閩君鐵杖七尺長色如黑虵氣如霜提攜但恐汝無力撞
堅過嶮安能傷柳公雖老尙強健閉門卻掃不復將知公足力無
嶮阻憐公未有登山侶回生四海惟一身袖中長劍爲兩人洞庭
漫天不覺過半酣起舞驚鬼神願公此杖亦如此適意遨遊日千
里歸來倚壁示時人海外蒼茫空自記

競渡

史君欲聽榜人謳一夜江波拍岸流父老不知招屈恨少年爭作
弄潮遊長鯨破浪聊堪比小旆逆風殊未收角勝爭先非老事凭
闌寓目思悠悠

登郡譙偶見姜應明司馬醉歸

蒼然莫色映樓臺
江市遊人夜未迴
何處酒仙無一事
肩輿鼾睡過橋來

送姜司馬

七歲立談明主前
江湖晚節弄漁船
鬪鷄誰識城東老
喪馬方知塞上賢
生計未成歸去詠
草書時發醉中顛
當年不解看齊物
氣踴如山誰見憐

寄題趙屺承事戲綵堂

春晚安輿遍浙東
永嘉別乘喜無窮
橐裝已笑分諸子
吏道何勞

問薛公堂上壽樽諸掾集室中禪論衲僧通與闌卻返林泉去幕
府長畱孝弟風

次韻溫守李鈞見寄兼簡毛大夫

梁苑相從簿領中清風相逐畫船東婆娑江海凌雲鶴飲啄籠樊
失渚鴻別後丹砂迷舊訣愁來白髮變衰翁此間詩老仍勅敵正
憶高吟酒盞空

次韻洞山克文長老

無地容錐卓年來轉覺貧偶知珠在手一任甌生塵竄逐非關性
顛狂卻甚真此心誰復識試語洞山人

試院唱酬十一首

戲呈試官呂防

新秋風月正涼天
空館相看學坐禪
滿榻詩書愁病眼
隔牆砧杵思高眠
霜飛一葉凋瓊玉
風遶雙松奏管絃
聞道熊羆歸夢數
侵天闥棘漫森然

次韻呂君豐城寶氣亭

紫氣飛空不自謀
誰憐黽勉匣中留
西山猛獸橫行甚
北海長鯨何日收
星斗不堪供醉舞
蛟龍會看反重湫
功成變化無踪跡
望斷中原百尺樓

次韻呂君見贈

偶然傾蓋接清言不覺門前晝漏傳
老病低摧方伏櫪壯心堅銳
正當年莫嫌客舍一杯酒試論瀟山三祖禪
明日程文堆几案只

應衰懶得安眠

呂前官舒州
問禪瀟山

次韻呂君興善寺靜軒

自恨尋山計苦遲年過四十始知非
小軒迎客如招隱野鳥窺人
自識機窗外竹深孤鶴下堦前
菊秀晚蜂飛老僧戰勝長幽寂瘦
骨緣何未肯肥

觀試進士呈試官

松庭散朝日棘戶啟秋風
鵠鷺紛來下旌旗儼未攻
馳詞看倚馬餘力送征鴻
逸足誰先到孤標想暗空
晶熒雙鏡並高下片言公
老病方耽睡飛沉一夢中

次前韻

南國號多士幾人洙泗風
英材自入殼壞陣不勞攻
文縉山藏豹飛高弋慕鴻
蚩妍歸品藻得失付虛空
考行先推本登賢旋奏公
期君緩歸轡一醉鹿鳴中

戲呈試官

只隔牆東便是家
帽帽還似在天涯
客心不耐聽松雨
歸信猶堪

飲菊花翦燭看書良寂寞披沙見玉忽喧譁自慙空館難畱客試
問姮娥稍駐車

次前韻三首

老去在家同出家楞伽四卷卽生涯龕詩怪我心猶壯細字憐君
眼未花霜落初驚衾簟冷酒酣猶喜笑言譁歸心知有三秋恨莫
學匆匆下坂車

門前溪水似漁家流浪江湖歸未涯邂逅高人來說法支離枯木
旋開花諸生試罷書如積劇縣歸時訟正譁安得騎鯨從李白試
看牛女轉雲車

濁醪能使客忘家，屈指歸期已有涯。
魚化昨宵驚細雨，鹿鳴他日飲寒花。
已諳江上肴蔬薄，莫笑衙前鼓笛譁。
太守况兼鄉曲舊，會須投轄止行車。

試罷後偶作

重門閉不開，烏鳥相呼樂。晨暉轉簾影，微風響松末。
喧譁適已定，寂歷方有覺。人生竟何事，外物巧相縛。
當時不自悟，已過空成作。耕耘亦何苦，遊宦殊自惡。
棄彼旣已誤，就此良應錯。誰能卽爾忘，隨緣更無作。

放牘後次韻毛守見招

飽食安眠愧不材，疎簾翠帟幸相陪。
深居正厭銀袍亂，失喜初聞鐵鎖開。
佳句徑蒙探古錦，小槽仍報滴新醅。
諸人欲見風流伯，不用招呼亦自來。

送毛滂齋郎

先志承顏善養親，束裝騎馬試爲臣。
酒腸天子渾無敵，詩律家傳便出人。
擁鼻高吟方自得，折腰奔走漸勞神。
歸來一笑須勤取，花發陳吳二月春。

燕貢士

泮水生芹藻，干旄在浚城。
桑鴉同變響，苹鹿共和鳴。
秋晚槐先墮

霜多桂向榮清尊助勸駕急管發驪聲勇銳青衿士淹通白髮生
芬芳雜蘭菊變化等鷗鯨去日衣冠盛歸時里巷驚坐中詞賦客
愧爾一經明

次韻毛君清居探菊

眼前黃葉畏秋霜耳畔啼蛩怨夜長佳節欣聞近萸菊清商試爲
奏伊涼疎狂久笑謀生拙貧病應憐爲口忙今日共君拚一醉從
教人道亦高陽

次韻毛君見贈

江國騷人不耐秋夜吟清句曉相投鋒藏豈願囊中脫尾斷終非

俎上羞擇地何年眞得意舖糟是處可同遊南遷尙有公知我人
事何須更預謀

次韻毛君偶成

年來衰病正相兼薄宦奔馳尙未厭詩句空多渾漫興俗緣已重
不須添聱牙向物知難合疎懶憐公獨未嫌時聽淵明詠歸去猶
應爲我故遲淹

孔平仲著作江州官舍小菴

近山不作看山計引水新成照水菴閉口忘言中自飽安心度日
更誰參簡編圍繞穿書蠹窗戶低回作繭蠶我亦一軒容膝住敝

裘籠飯有餘甘

送饒州周沃秀才免解

少年工作賦中歲復窮經驥老終知道劍埋新發礪束裘隣里助
答策友朋聽還似臨淄貢隨風起北溟

雪中洞山黃蘗二禪師相訪

江南氣暖冬未回北風吹雪真快哉雪中訪我二大士試問此雪
從何來君不見六月赤日起冰雹又不見臘月幽谷寒花開紛然
變化一彈指不妨明鏡無纖埃

毛國鎮生日二絕

生日元同小趙公里閭相接往還通怪公日夜歸心切欲寄此生

丹竈中

世謂叔平大趙叅政闕道小趙叅政趙公善養生故有丹竈之句

聞公歸橐尙空虛近送楞嚴十卷書心地本無生滅處定逢生日亦如如

次韻毛君將歸

疎傳思歸不待時孟軻出晝苦行遲新詩尙許畱章句故事誰從問典彝金馬尙應堪避世石泉未信可忘饑不才似我真當去零落衡茅隔雍岐

送楊騰山人

胸中萬卷書不如一囊錢不見楊夫子歲晚道路邊夜歸空床臥
兩手摩涌泉窗前雪花落真火中自然渙然發微潤飛上崑崙顛
霏霏雨甘露稍稍流丹田閉目內自視色如黃金妍至陽不獨凝
當與純陰堅一窮百不遂此事終無緣君看抱朴子共推古神仙
無錢買丹砂遺恨盈塵編歸去守茅屋道成要有年

次韻子瞻與安節夜坐三首

前山積雪暮崢嶸燕坐微聞落瓦聲共對一尊通夜語相看萬里
故鄉情信歸嶺上寒梅遠恨極江南春草生明日青銅添白髮且
須醉睡倒燈檠

少年高論苦崢嶸老學寒蟬不復聲
目斷家山空記路手披禪冊
漸忘情功名久已知前錯婚嫁
猶須畢此生家世讀書難便廢
漫畱案上鐵燈檠

謫官似我無歸計落第憐渠有
屈聲握手天涯同一笑倚門歲晚
不勝情黃崗俯仰成陳迹白首蹉
跎畏後生歸去且安南巷樂莫
看歌舞醉長檠

次韻毛君上書求歸未報

白髮憂民帶減圍頻聞慷慨賦將歸
近傳道士連三噓久悟禪門
第一機夜永庵中詩自得日高門外
客來稀此心素定誰能勸祇

有丁寧詔莫違

次韻毛君絕句

中池有士閉重關夜發天光走玉環
白日對人人不識幅巾破褐
任塵漫

次韻毛君畱別

問天乞得不訾身屈指人間今幾人
魚縱江潭真窟宅鶴飛松嶺
倍精神清風吹雨停歸騎舊圃畱花
送晚春自號白雲知有意便
從丹竈拂埃塵

送毛君致仕還鄉

古人避世事豈問家有無但言鴻鵠性不受樊籠拘公家昔盛時
阡陌連三衢倉廩濟寒餓婚嫁營羈孤千金赴高義脫手曾須臾
晚爲二千石得不償所逋撫掌不復言但以文字娛我恨見公遲
冉冉垂霜鬚高吟看落筆劇飲驚倒壺負罪不自知適意忘憂虞
忽聞叩天闈言旋故山廬朋友不及謀親戚亦驚呼人生各有意
何暇問俗徒嗟我好奇節歎公眞丈夫天高片帆遠日斷清風徂
惟應東宮保迎笑相攜扶

贈景福順長老二首

并序

轍幼侍先君聞嘗遊廬山過圓通見訥禪師畱連久之元豐五

年以譴居高安景福順公不遠百里惠然來訪自言昔從訥於
圓通逮與先君遊歲月遷謝今三十六年矣二公皆吾里人訥
之化去已十一年而順公年七十四神完氣定聰明了達對之
悵然懷想疇昔作二篇贈之

屈指江西老多言劍外人身心已無著鄉黨漫相親竄逐知何取
周旋意甚真仍將大雷雨一洗百生塵

其二

念昔先君子南遊四十年相看順老在想見訥師賢歲歷風輪轉
禪心海月圓常情計延促無語對潸然

次韻孔平仲著作見寄四首

昔在京城南成均對茅屋清晨屣履過不顧車擊轂時有江南生
能使多士服同儕長鋒銳兄弟更馳逐文成劇翻水賦罷有餘燭
連收頷底髭未耗髀中肉飛騰困中路黽勉啄場粟歸來九江上
家有十畝竹一官龕包裹萬卷中自足還如白司馬日聽杜鵑哭
我來萬里外命與江波觸罪重慙故人囊空仰微祿已爲達士笑
尙謂愚者福米鹽日草草奔走常碌碌尺書慰貧病佳句爛珪玉
多難畏人知胡爲強題目徂年慕桑梓歸念寄鴻鵠但願洗餘愆

躬耕江一曲

其二

共居天地間大類一間屋推排出高下何異車轉轂死生本晝夜
禍福固倚伏誰令塵垢昏浪與紛華逐譬如薪中火外照不自燭
感君探至道勸我減梁肉虛心有遺味實腹不須粟芬敷謝桃杏
清勁比松竹息微知氣定睡少驗神足胡爲嗜一飽坐使百神哭
要知丹砂異不受腥腐觸可憐山林姿自縛斗升祿君看出世士
肯屑世間福寧從市井遊與眾同碌碌不願束冠裳腰金佩鳴玉
斯人今何在未易識凡目恐在廬山中飛翔逐黃鶻試用物色尋
應歌紫芝曲

其三

百病侵形骸漸老同破屋中有一寸空能用輻輳忽如丹砂走
不受凡火伏前瞻已不遠後躡愈難逐將炊甑中飯未悟窗下燭
聰明役聲形口腹嗜魚肉塵泥翳泉井荆棘敗禾粟未知按妙指
漫欲理絲竹廬山多名縉過客禮白足達觀等存亡世俗強歌哭
確然金石心不畏蚊蚋觸順忍爲裳衣供施謝榮祿真人我自有
渡海笑徐福眾皆指庸庸自顧非碌碌愧君詩意厚桃李報瓊玉
舉網羅眾禽有獲非一目喧啾定無用要自取黃鵠君看大方家
慎勿畱一曲

其四

治生非所長兒女驚滿屋作官又迂疎不望載朱轂因緣呈罪罟
未許卽潛伏空餘讀書病日與古人逐老妻憐眼昏入夜屏燈燭
上官念貧窶時節饋醪肉衰年類蒲柳世事劇麻粟數日望歸田
寄語先栽竹文章亦細事勤苦定何足君詩四相攻欲看守陣哭
愧無卽墨巧不解火牛觸自非太學生彫琢事干祿安心已近道
閉口豈非福胡爲調狂詞玉石相落礫腹中抱丹砂舌下漱白玉
作詩雖云好未免亂心目奕秋教二人不取志鴻鵠摩詰非不言

遺韻寄終曲

陰晴不定節唐觀祕校并敖吳二君五首

積雨春連夏新晴忽復陰江痕漲猶在梅氣潤相侵蕉紵還須脫
圖書漸不禁江南舊風俗愁絕北來心

其二

蠶眠初上簇麥熟正磨鎌雲氣重重合江流夜夜添薦饑人甚困
多病我仍兼欲就橋南宿單衣莫雨露

其三

漲江方斷渡小棹信輕生貧賤誰憐汝漂浮空自驚一官終竊食
何計早歸耕忽發騷人恨淒涼久未平

其四

西鄰豫章客病骨瘦藥藥清夜眠孤枕終朝飽一簞雨多愁不出
請罷未應餐約我晴相過門前泥欲乾

其五

二子薪中楚相攜泮上游蓋鹽聊度日交象久忘憂寂寞君何病
驅馳我自羞向時采芹處永日看鳧鷗

樂城集卷之十一終

樂城集卷之二十一

宋西蜀蘇轍子由著

明東吳

王執禮子敬
顧天敘禮初

全校

詩八十九首

雨後遊大愚

風光四月尚春餘
淫雨初乾積潦除
古寺蕭條仍負郭
閑官疎散亦肩輿
摘茶戶外丞黃葉
掘笋林中間綠蔬
一飽人生真易足
畝營茅屋傍僧居

送高安羅令審禮

一邑憂勞水旱中
牛刀閑暇似無功
政成仍喜新蠶熟
歸去還將舊橐空
清白久聞誇父老
沉埋誰爲愬諸公
謫居長恨交遊少
悵望肩輿又欲東

送唐覲

溪上幽居少四鄰
西家幸有著書人
經年食菜誰憐瘦
終日題詩自不貧
身在江湖釣竿地
心馳蘭會戰車塵
此行便有飛騰處
笑殺年來老病身

唐君常欲爲陝西官
慨然有功名之志

次韻唐覲送姜應明謁新昌杜簿

夫子雖窮氣浩然
輕簑短笠傲江天
薄遊到處唯耽酒
歸去無心

苦問田泮上講官殊不俗山中老簿亦疑仙相從未足還辭去欲

向曹溪更問禪

姜如晦方作嶺外之行

新種芭蕉

芭蕉移種未多時濯濯芳莖已數圍畢竟空心何所有欲傾大葉
不勝肥蕭騷莫雨鳴山樂狼籍秋霜脫敝衣堂上幽人觀幻久逢
人指示此身非

次韻姜應明黃蘗山中見寄

垂老閑居味更深此身隨世任浮沉北窗未厭曲肱臥西落能傳
擁鼻吟兀馬徬徨猶寄食敝裘安樂信無心我今漂泊還相似同

愧高僧支道林

次韻黃大臨秀才見寄

故人聚散霜前葉往事眇茫風際烟遊宦一生非有已隱居萬事
不由天崎嶇檻穽方謀食嘯傲山林肯計年賴已將心問盧老相
逢他日笑風顛

次韻李朝散遊洞山二首

古寺依山占幾峰精廬髣髴類天宮三年欲到官爲礙百里相望
意自通無事佛僧何處著人羣鳥獸不妨同眼前簿領何時脫一
笑相看丈室中

僧老經時不出山法堂延客未曾關心開寶月嬋娟處身寄浮雲
出沒間休夏巾鉢誰與共迎秋水石不勝閑近來寄我金剛頌欲
指胸中無所還

簡學中諸生

泮水秋生藻荇涼莫窗燈火亂螢光圖書粗足惟須讀菽粟才供
且自強羽籥暗催新節物弦歌不廢近詩章腐儒最喜南遷後仍
見西離白鷺行

以蜜酒送柳真公

床頭釀酒一年餘氣味全非卓氏壚送與幽人試嘗看不應知是

百花鬚

次韻柳見答

桂酒無人寄豫章

江西官釀惟豫章最佳

羈愁牢落遣誰當
烹煎崖蜜眞牽

強慙愧山蜂久蓄藏
江上鱸橙正熟山頭吹帽菊初香
漂流異日俱陳迹
笑說過從想未忘

披仙亭晚飲

落日欲沒多雲烟
南山暝鴉歸北山
樓臺城上半明滅
燈火橋頭初往還
江西八月熱猶在坐中
遷客頭欲班
何時解網聽歸去
黃花白酒踈籬間

余居高安三年每晨入莫出輒過聖壽訪聽長老謁方子明
浴頭笑語移刻而歸歲月既久作一詩記之

朝來賣酒江南市日莫歸爲江北人禪老未嫌參請數漁舟空怪
往來頻每慙菜飯分齋鉢時乞香泉洗病身世味漸消婚嫁了幅
巾緇褐許相親

次韻子瞻感舊見寄

少年耽世味徘徊不能去老來悟前非尙愧昔遊處君才最高峙
鶴行雞羣中我雖非君對顧以兄弟同結髮皆讀書明月入我牖
縱橫萬餘卷臨紙但揮手學成竟無用掩卷空自疑卻尋故山友

重赴幽居期秋風送餘熱冉冉如人老衣裘當及時田廬亦須早
種竹竹生笋種稻稻亦成浩歌歸來曲曲終有遺聲

次韻和人豐歲

風雨迎寒欲勞農今年眞不負元豐蓋藏共荷官無擾眠食安知
帝有功草笠黃冠將蜡祀羔羊朋酒亦幽風請君早具躋堂飲退
食委虵正自公

同孔常父作張夫人詩

女子勿言弱男兒何必強君看張夫人身舉十五喪頭上脫笄珥
篋中斥襦裳築墳連邱山松栢鬱蒼蒼親戚不爲助涕泣感道傍

昔有王氏老身爲尙書郎親死棄不葬簪裾日翱翔白骨委廬陵
宦遊在岐陽一旦有丈夫軒軒類佯狂相面識心腹開口言災祥
嗟汝平生事不了令誰當汝身暖絲綿汝口甘稻梁衣食未嘗廢
此事乃可忘一言中肝心投身拜其床傍人漫不知相視空茫茫
終言汝不悛物理久必償兒女病手足相隨就淪亡鄙夫本愚悍
過耳風吹墻明年及前期長子憂忤瘍一麾守巴峽雙柩還故鄉

弱息雖僅存蹒跚亦非良誰言天地寬網目固自張古事遠不信

近事世所詳企張非求福禍敗當懲王

嘉祐末年李士寧言王君事於右扶風其報甚速張

夫人南都人孔推官常甫作詩言其賢
邀余同作弁言李生事或足以警世云

次烟字韻答黃庭堅

病臥江干鬚帶雪老捻書卷眼生烟貧如陶令仍耽酒窮似湘纍
不問天令弟近應憐廢學大兄昔許叩延年比聞蔬茹隨僧供相
見能容醉後顛

魯直兄舊於齊州以養生見教

東軒長老二絕

弁序

始余於官舍營東軒彭城曹君煥子文自浮光訪余於高安道
過黃岡家兄子瞻以詩送之曰君到高安幾日迴一時抖擻舊
塵埃贈君一籠牢收取盛取東軒長老來君過廬山見圓通知
慎禪師出詩示之師嘗與余通書見之欣然明日謂君昨見黃

州詩通夕不寐以一偈繼之曰東軒長老未相逢卻見黃州一
信通何用揚眉資目擊須知千里事同風吾野人不能數爲書
君爲我誦之而已君既至未暇及此客有自廬山至者曰慎師
送客出門還入丈室燕坐而寂君乃具道其事余感之作二絕
其一以答子瞻其二以答慎也

東軒正似虛空樣何處人家籠解盛縱使盛來無處著雪堂自有

老師兄

子瞻新築
東坡雪堂

檐頭挑得黃州籠行過圓通一笑開卻到山前人已寂亦無一物

可擔迴

題方子明道人東窗

紙窗雲葉淨香篆細烟青客到催茶磨泉聲響石鉞禪關敲每應
丹訣問無經贈我刀圭藥年來髮變星

次前韻

閉門何所事毛髮日青青齒折登山屐塵生貰酒鉞調心開貝葉
救病讀難經定起無人見寒燈一點星

迎寄王適

投鼠千山恨不深扁舟夏涉氣如烝重來疋馬君何事歸去飛鴻
我未能養氣經年惟脫粟讀書終夜有寒燈安心且作衰慵伴海

底鯤魚會化鵬

王度支陶挽詞二首

風蹟殊不昧聲名豈偶然
長途催駟驥爽氣激鷹鷂
薏苡成遺恨松楸卜遠年
淒涼故吏盡誰泣鬣封前

其二

京塵昔傾蓋江國見佳城
零落舊冠劍艱難孝弟兄
存亡看世俗意氣憶平生
曉鐸知人恨幽音亦未平

次韻陳師仲主簿見寄

朽株難刻畫枯葉任凋零
舊友頻相問村酤獨未醒
山牙收細茗

江實得流萍頗似申屠子都忘足被刑

寄題江渙長官南園茅齋

白髮辛勤困小邦塵勞坐使壯心降
河陽罷後成南圃彭澤歸來臥北窗
畦畔草生親荷鋪床頭酒熟自傾缸
因君遣我添歸興舊有茅茨濯錦江

詠霜二首

江南雪不到霜露滿山村紙被欺瓊厚
茅簷笑瓦溫何曾凝
詠
淶有意隔朝暾底日身無事高眠不出門

其二

清霜欺客病乘夜逼窗扉坐睡依爐暖細聲聞葉飛蕉絺空滿篋
砧杵旋催衣起看庭前草松筠未覺非

次韻吳厚秀才見寄

壯心摧折漸無餘早歲爲文老不如登木求魚知我拙循窠覓鬼
笑君疎清尊獨酌夜方半白髮潛生歲欲除久恐交親還往絕床
頭猶喜數行書

乾荔支

含露迎風惜不嘗故將赤日損容光紅消白瘦香猶在想見當年

十八娘

次韻王適元日示曹煥二首

井底屠酥浸舊方
床頭冬釀壓瓊漿
舊來喜與門前客
終日同爲酒後狂
老大心情今已盡
塵埃鬢髮亦無光
江南畱滯歸何日
萬里逢春思故鄉

放逐三年未遣回
復驚爆竹起春雷
祈年粗有樽中桂
寄遠仍持嶺上梅
莫笑牛狸抵羊酪
漫將崖蜜代官醅
二君未肯嫌貧病
猶得衰顏一笑開

寄梅仙觀楊智遠道士

道師近在真人峯
欲往見之路無從
去年許我入城市
塵埃暗天

待不至莫往莫來勞我心道書寄我千黃金蠶衣肉食思慮短文
字滿前看不見口傳指授要有時脫去羅網當見之梅翁漢朝南
昌尉手摩龍鱗言世事一朝拂衣去不還身騎白麟翳紅鸞我今
雖復墮塵土道師何不與我語他年策足投名山相逢拍手一破
顏

春雪

溫風吹破臘畱雪惱新春信逐殘梅到花從半夜勻旋消微覆瓦
狂下亦欺人壓竹時聞落埋萱久未伸山川濛不解樓觀洗成新
擁褐僧方睡開門客屢嘔爨烟知歲稔履迹笑吾貧畦凍初生韭

泥融正賣薪寒魚爭就汕濁酒頗無巡預喜田宜麥槃飡餅餌頻

贈石臺問長老二絕

弁叙

石臺長老問公本成都吳氏子棄俗出家手書法華經字細如
黑蟻前後若一將誦之萬遍雖老而精進不倦脇不至席者二
十有三年余來高安以鄉人相好蓋余懶而好睡見之惕然自
警因贈之二小詩云

法達曾經見老盧半生勤苦一朝虛心通口誦方無礙笑把吳鸞

細字書

蜀中藏經往往有古仙人吳采鸞細書經卷精妙可愛

蒲團布衲一繩床心地虛明睡自亡長伴空中月天子東方行道

到西方

和毛國鎮白雲莊五詠

掬泉軒

卜築高深已有山起居清澗可無泉穿牆白練秋聲細照屋清銅
曉色鮮已放魚蝦嫌跳擲更除蘋藻任漪漣只應明月中霄下長
共禪心相向圓

平溪堂

清溪似與隱君謀故入堂前漫不收盥手從今休汲井浮觴取意
便臨流花漂澗谷來應遠石激琴箏久未休莫把朱欄強圍繞山

家事事要清幽

眺遠臺

山似高人長遠人不登高處見無因築臺土石無多子照眼峯巒
得許新陣馬奔騰時絕遠風濤舒卷忽無垠白雲自是逃名處猶
恐此中藏隱淪

濯纓菴

臨池濯足惜泉清纓上無塵且強名橫木爲橋便獨往結茅依島
類天成往還漸少人誰識寢食無爲身轉輕有似三吳朱處士釣
魚誰與話西征

白雲莊偶題

歸去攜家住白雲雲中猿鶴許同羣
陶公酒後詩偏好疎傳金餘
客屢熏芒屨潛行逐漁釣壺漿時出勞
耕耘卻看人世應微笑未
熟黃梁晝夢紛

次韻王適落日江上二首

寒烟冪清江漁唱扁舟上江轉少人家
自此知安往維舟倚葦薄
明月獨相向欲曉醉應醒還逐輕鷗颺

其二

稍息南市喧初上東山月潛魚忽驚躡
飢雁時斷絕落葉誤投籤

繁霜疑積雪苦寒良難久愛此元氣潔

張秀才見寫陋容

潦倒形骸山上樗每經風雨輒凋疎勞君爲寫支離狀異日長看
老病初落筆縱橫中自喜賦形深穩妙無餘偶然挂壁低頭笑俱
幻何妨彼亦如

同王適曹煥遊清居院步還所居

身爲江城吏心似野田叟尋僧忽忘歸飽食莫攜手畏人久成性
路繞古城後茅茨遠相望雞犬亦時有人還市井罷日落狐兔走
迴風吹橫烟燒火卷林藪草深徑漸惡荆棘時挂肘褰裳涉沮洳

斜絕汗池口投荒分岑寂歆側吾自取二君獨何爲經歲坐相守
遊從乏車騎飲食厭菘韭周旋未忍棄辛苦亦何負歸來倚南窗
試挹樽中酒笑問黃泥行此味還同否

子瞻謫居齊安自臨臯亭
遊東坡路過黃泥坂作黃

泥坂詞二君皆新
自齊安來故云

次韻王適春雨

久遭客禁往還稀風雨蕭條只自知春色有情猶入眼客愁無賴
巧侵簷山僧寄語收茶日野老畱人供社時久住不須嫌寂寞此
間偏與拙相宜

和子瞻蜜酒歌

蜂王舉家千萬口黃蠟爲糧蜜爲酒口銜澗水拾花鬚沮如滿房
何不有山中醉飽誰得知割脾分蜜會無遺調和知與酒同法試
投麴蘖真相宜城中禁酒如禁盜三百青銅愁杜老先生年來無
俸錢一斗徑須囊一倒舖糟不聽漁父言煉蜜深愧仙人傳掉頭
不問辟穀藥忍饑不如長醉眠

次韻講律李司理憲見贈

強將羔雁聘黃晞破褐疎巾倚夕暉禮律縱橫開卷盡藿鹽冷落
待賢非日高几案弦歌罷夜永窗扉燈火微猶喜江邊莫春近舞
雩風雨得同歸

次韻王適遊陳氏園

宿雨晴來春已晚
眾花飄盡野猶香
舞雩便可同沂上
飲禊何妨似洛陽
新圃近聞穿沼濶
漲江初喜放舟長
年來簿領縈人甚
何計相隨入醉鄉

答孔平仲二偈

熟睡將經作枕頭
君家事業太悠悠
要須睡著元非睡
未可昏昏便爾休

龜毛兔角號空虛
旣被無收豈是無
自有真無遍諸有
燈光何礙也嫌渠

次韻柳真公閑居春日

春寒漸欲減衣綿，雨勢冥冥水拍天。
一局無言消日永，新詩得意許人傳。
惜花田地應慵掃，護笋藩籬可細編。
好事報君知我喜，同官欲到得閑眠。

次韻王適東軒卽事三首

新竹依牆未出尋，牆東桃李卻成林。
池塘草長初饒夢，村落鶯啼恰稱心。
江滿船頭欲轉泥，融屐齒莫尤深。
閉門憐子成書癖，試買村醪相伴斟。

眼看東隣五畝花，茅簷竹戶野人家。
過牆每欲隨飛蝶，歸舍誰憐

已莫鴟幽客偶來成晚飯野僧何日寄新茶三年氣味長如此歸計遲遲也自嘉

北園春草徑微微未用頻教剪棘茨蜂陣紛紛初養蜜鶯巢淺淺欲生兒客情流水兼山遠歸夢遊絲向日遲懶病相將渾欲慣賴君索我強裁詩

送李憲司理還新喻

采芹芹已老浴沂沂尚寒蒯緱長嘆息首藉正闌干黃卷忘憂易青衫行路難歸耕未有計且復調閑官

問黃蘗長老疾

四大俱非五蘊空身心河岳盡消鎔病根何處容他住日夜還將
藥石攻

復次烟字韻答黃大臨庭堅見寄二首

水竹遮藏自一川日高茅屋始炊烟犬牙舂米新秋後麥粒烝茶
欲社天冠蓋只今成棄物杉松他日記栽年定應笑我勞生在卯
睡聞呼衣爲顛

十載勞思寤寐間新詩態度比雲烟清風吹我無千里明月隨人
共一天歸去林泉應避暑北征道路恐經年與君共愧知時鶴養
子先依黑栢顛

次韻子瞻臨臯新葺南堂五絕

江聲六月撼長堤，雪嶺千重過屋西。
一葉軒昂方斷渡，南堂蕭散夢寒溪。

旅食三年已是家，堂成非陋亦非華。
何方道士知人意，授與爐中一粒砂。

北牖清風正滿床，東坡野菜漫充腸。
華池自有醞醐味，丈室仍聞簷蔔香。

隣人漸熟容賒酒，故客親畱爲種蔬。
住穩不論歸有日，船通何患出無車。

客去知公醉欲眠酒醒寒月墮江烟床頭復有三升蜜貧困相資
恐是天

次韻王適大水

高安昔到歲方閏大水初去城如墟危譙墮地瓦破裂長橋斷纜
船逃遁漂浮隙穴亂羣蟻奔走沙礫摧嘉疏里閭破散兵火後飲
食敝陋魚蝦餘投荒豈復有便地遇災祇復傷羸軀人言西有蛟
蜃穴閏年每與風雷俱漫溝溢壑恣游蕩傾崖拔木曾須與鷄豚
浪走不復保老稚裸泣空長吁滯畱再與茲水會淪胥未哂斯民
愚人生所遇偶然耳得失何用分鏹銖

贈三局能師二絕

得失從來似偶然因師聊復問行年
此生竟墮陰陽數方信修行力未全

旅食江千秋復春歸耕未遂不勝貧
憑師細考何年月可買山田養病身

臨川陳憲大夫挽詞二首

一時冠蓋盛臨川直亮推公益友先
淡泊朱絲初少味蕭疎翠竹久彌鮮
崎嶇處世曾何病奔走成功亦偶然
天理更疎終不失雍雍今見子孫賢

五月扁舟憶過門，哀憐逐客爲招魂。
開樽不惜清泉潔，揮汗相看白雨翻。
病起清言驚苦瘦，歸休尺牘尙相存。
秋風灑涕松楸外，談笑猶疑對竹軒。

公家有竹軒
輒嘗賦詩

次韻知郡賈蕃大夫思歸

江城漂泊最多時，邂逅誰令長者期。
得坎浮槎應有命，投林驚鵲且安枝。
何年笑語還畱客，終日勤勞數問兒。
鈴閣清虛非此比，秋風歸興恐非宜。

久不作詩呈王適

憐君多病仍經暑，笑我微官長坐曹。
落日東軒談不足，秋風北棹

意空勞懶將詞賦占鴉臆頻夢江湖把蟹螯筆硯生塵空度日他
年何用繼離騷

喜王鞏承事北歸

同罪南遷驚最遠乘流北下喜先歸謂言一笑秋風後却顧千山
驛路非嶺外雲烟隨夢遠江邊魚蟹爲人肥還家嫁女都無事臥
讀詩書盡掩扉

予初到筠卽於酒務庭中種竹四叢杉二本及今三年二物
皆茂秋八月洗竹培杉偶賦短篇呈同官

種竹成叢移出簷三年慰我病厭厭剪除亂葉風初好封植孤根

筓自添高節不知塵土辱堅姿
試待雪霜霑屬君畱取障斜日
仍記當年此滯淹

和王鞏見寄三首

南遷春及秋江湖未云半
逮此歸路長始悟行日遠
幽憂脫沉痼清夢驚婉婉
行行逢故人笑語雜悲泣

其二

江秋北風多歸帆未應駛
天寒雁南向家書空滿紙
契濶幸安平婚嫁須纓珥
交遊何爲者空復念君至

其三

折葉每安心連環非所計感君扁舟返念我一廬廢懷思樂全老
疇昔忘言契丹砂儻已成白首願終惠

復次韻

滕王閣在誰攜手徐孺湖寬可放情楚客解書南國恨秦箏助發
上林鶯繫匏獨負杯中物擁鼻知逢洛下生問得長鬚添夢想蓬
窗燈火達天明

近遣僕至鍾陵還言定國與黃君
魯直會於舟中燈火終夜而去

孔毅父封君挽詞二首

交契良人厚家風季婦賢詩書中有助蘋藻歲無愆象服期他日
恩封屬此年神傷自不覺吊客問潛然

其二

別日笑言重歸來藥餌憂鍾歌掩不試貝葉亂誰收恨極囊封在
情多壟木稠埋文應自作一一記徽猷

上高息軒起亭二絕

山下清谿谿上市谿光山色映人烟幽亭正在人聲裡長與谿山
共寂然

溪父起收罾下鯉山翁起賣焙中茶長官亦與人俱起笑擁黃紬
放早衙

九月十一日書事

東墻瘦菊早開花
九日金釧已自嘉
黍麥候遲初響
礬米鹽法細
未還家潑醅昨夜
驚泉湧洗盞今晨
聽婦誇歸採茱萸
重一醉不
須怪問日時差

和王適寒夜讀書

久從市井役百事廢
不理感君讀書篇
惜此寒夜暑殷勤
附燈燭
黽勉就圖史逡巡
揖虞夏汗漫馳劉
李斯文家舊物早
歲夙從事
一從慕羶腥中棄
如敝屣今夕亦何
夕忽如舊遊至終
篇再三歎
推枕不成寐人生
無百年所欲知有
幾懸知未必得奔
走若趨市
微言寄翰墨開卷
入心耳胡爲棄不
收所逐在難覲

和王適新葺小室

向日堂東一室存，竹爲窗壁席爲門。
心如白月光長照，氣結丹砂體自溫。
飯軟莫嫌紅米賤，酒香故取潑醅渾。
他年一笑同誰說，伴我三年江上村。

病中賈大夫相訪因遊中宮僧舍二首

江城寒氣入肌膚，得告歸來強自扶。
五馬獨能尋杜老，一床深愧致文殊。
體虛正覺身如幻，談劇能令病自無。
明日出門還擾擾，年來眞畏酒家壚。

東隣修竹野僧家，亂柳枯桑一徑斜。
逐客慣曾迂短策，使君何事

駐高牙蕭條已似連村塢邂逅應容設晚茶慙愧病夫無氣力隔
墻空聽吏兵譁

和王適灸背讀書

少年讀書處寒夜冷無火老來百事慵灸背但空坐眼昏愁細書
把卷惟恐臥寒衣補故褐家釀熟新糯微微窗影斜暖暖雲陰過
昏然偶成寐鼻息已無奈兒童更笑呼書冊正前墮衰懶今自由
不復問冬課

同王適賦雪

北風吹雨雨不斷遍滿虛空作飛霰紙窗獨臥不成眠茅屋無聲

時一泣鳥鳥錯莫寒未起庭戶空明夜驚且重樓複閣爛生光絕
澗連山漫不見夾砌雙杉洗更碧滿田碧草埋應爛城中閉戶無
履迹市上孤烟數晨爨細排玉著短垂簷暗結輕冰時八研撥灰
有客顧尊俎迹兔何人試鷹犬未容行役掃車轂應有老農歌麥
飯一來江城若俄頃四見百花飛面旋坐看酒甕誰敢嘗歸踏水
泥屢成濺年來橋板斷不屬莫出肩輿足憂患到家昏黑空自笑
慙婦勤勞每長嘆牀頭有酒未用沽囊裡無錢不勞筭更令雪片
大如手終勝溪瘴長熏眼謁告猶能不出門典衣共子成高讌